

tis idoneam procuravimus. Ejusdem quoque intentionis studio, imbecillitati fragiliūm consulemus, etiam tintinnabula, atque bechinia, diversaque divinæ donus utensilia comparavimus. Calices quoque duos argenteos pulcherrime deauratos hac vobis ratione providimus; ut cum saera Dominici corporis et sanguinis mysteria vultis accipere, stannum, vel vi- lius quodcunque metallum vestris labiis nequaquam necesse sit adhibere. Conspicua nihilominus sacro-sancto altari tegmina, et celebrandis missarum solemnniis preiiosa contulimus ornamenta.

Hæc omnia, fratres, nos non sine labore quæsimus, ut vobis laboris impendia tolleremus: tantoque liberius se vester animus ad alta sustolleret, quanto minus hunc ad providenda sibi infirma rei B

A familiaris inopia non gravaret. Unde rogo, fratres charissimi, quicunque mihi estis in hujus loci sacri habitaculo successuri, ut qui vobis ante consului, quam hujus vitæ haberetis ingressum; vos etiam me pia vicissitudine vestris adjuvetis orationibus jam defunctum; et qui vobis paravi locum religiose vivendi, vos mihi copiam acquiratis indulgentiam promerendi. Ecce, fratres mei, sui quod estis: et emensus sum, quod transitis. Præsto vobis sunt quæ deserui; propinquum est quo perveni. Sic igitur compendium vestræ mortalitatis excurrite; ut elapsis vanis, quæ temporaliter transeunt, ad bona perveniat, quæ his perpetuo mansura succedunt.

*Sit nomen Domini benedictum.*

## 329 330 OPUSCULUM DECIMUM QUINTUM.

### DE SUÆ CONGREGATIONIS INSTITUTIS. AD STEPHANUM MONACHUM.

**ARGUMENTUM.** — Stephano cuidam qui ex cœnobio ad eremum emigraverat, eremiticæ vitæ, et conversationis præcepta desideranti depromit: nec non eremitarum, quibus ipse præerat, regulas, et vivendi instituta exponit; saluberrima interim monita immiscens; ut rudem adhuc, et hujusmodi viae rationis inexpertum ad insidias cacodæmonis superandas: dura, et aspera quæque perferenda: et denique ad omnes perfecti eremitæ numeros implendos gradatim perducat.

Charissimo fratri STEPHANO, amore supernæ charitatis inclusu, PETRUS ultimus crucis Christi servus, salutem in idipsum.

Honestæ petitionis tuæ, dilectissime fili, vota suscepimus, quibus te per nostræ admonitionis apices eremiticæ vitæ regula postulas informari. Monasterialem quippe latitudinem fugiens, mox servido spiritu cellulæ te carceralibus angustiis inclusisti. Non contempnenda plane petitio, nec otiosum, vel ineptum negotium: sed si executor inveniretur idoneus, etiam posteris non mediocriter profuturum. Nos autem, qui in hujus professionis via neminem vivendo præimus, cœteros loquendo præire, velut indices, sive judices itineris, temerarium judicamus. Præpostorum quippe est, si lingua tanquam magisterii super alios arripiat ferulam, cuius adhuc vita flagellis obnoxia exhibet clientelam. Sed qui calcato propriæ voluntatis arbitrio obedire Deo per omnia decrevisti, dignum profecto est tuis quoque petitionibus a fraterna charitate non segniter obedire.

Quapropter in angusto positi, dum et tuis desideriis satisfacere cupimus, et tamen propriæ mensuræ metas excedere non audemus, tutum nobis arbitramur, et integrum hujus quidem institutionis præcepta non edere; sufficiat autem, quod in nostra fieri congregatione conspicimus, et experti sumus, simpliciter explicare. Nec tam quid ab eremitis fieri debeat, generali definitione præscribimus, quam quod in hac eremo fiat, cum de loco, tum persona specialiter intimamus. Quod tamen ex charitate le-

C gentibus infructuosum esse non credimus, cum ad perfectionis cuīmen præcepta quidem moveant, sed exempla compellant.

#### CAPUT PRIMUM.

##### *De soli.ariæ vitæ laudibus.*

Vere, frater, ut dicitur, ipsius rei notam fixisti, cum ad Deum redire non per qualemque, sed per auream viam laudabiliter elegisti. Nec ad hoc te prudentia humanitatis impulit, sed divinus procul dubio Spiritus incitavit. Hæc est enim via, quæ inter reliquas ad summam tendentes eminens, et excelsa est. Interim per se currentem jam ponit in patria: et eum, qui adhuc versatur in labore, jam quodammodo recreat, et consolatur in requie. Hæc nimur via per se commenantum gressus neque spinis sollicitudinum pungit, neque luto negotiorum sæcularium impedit. Porro hæc via spatiosa simul et angusta: sed hoc modo, ut quisquis per eam comite cœlesti desiderio graditur, et propter angustias noxie non impingat, et propter latitudinem a rectitudinis linea non divertat. Nam etsi incipientibus plerumque stricta, vel difficilis videatur, non tamen mox, nisi quod absit, fides desit, inconstanti pusillanimitate deseritur: assuetis autem et perfectioni jam propinquantibus, vel haerentibus facilis quidam, et quodammodo lata via videtur eremita vita. Nunquam tamen a portanda post Jesum cruce deficient, dum et proprias voluntates reprimunt, et adversus cogitationem suarum tentamenta confidunt. Duxisti, frater, uxorem, quam non quidem

cum uxoribus Jacob vel a gignenda sobole sterilitas privet, vel a venustate vultus lippitudo **331** dederet; sed illam profecto, quæ sit et cum Lia secunda, et cum Rachele formosa. Nimurum ut et tibi clarescat obtutus ad videndum principium, et plurimi nobiles tui servoris imitentur exemplum.

Hæc profecto est mulier, de qua dicitur: « Quia fortitudo, et decor est indumentum ejus (*Prov. xxxi*). » Solitariæ nempe conversationis officium est, ut sic desudet quis in magni operis fortitudine, quatenus semper sollicitus sit in exhibenda decori animi puritate. Hæc est, inquam, de qua rursus dicitur: Quia « manum suam misit ad fortia, et digitæ ejus apprehenderunt fusum (*Ibid.*). » Quia videlicet hujus vitæ idoneus executor sic se per majora opera ex desiderii fervore dilatat, ut etiam cautus quæ sunt minima non relinquat. Hæc plane utrarumque sororum Lazari sibi vindicat dignitatem: quia et cum Maria sedens ad vestigia Domini ejus verbis intendit, et cum Martha eumdem Dominum diversis sanctarum virtutum epulis reficit (*Luc. xix*).

Sed cur in describendis hujus sanctæ vitæ meritis diutius immoror? Plane ut compendiosius eloquar, multæ sunt viæ quibus itur ad Deum; diversi sunt ordines in universitate fidelium: sed in omnibus his nulla profecto via est tam recta, tam certa, tam expedita, atque cunctis suppliantioriæ impactionis offendiculis aliena; quia et omnes fere occasionses, quibus peccari possit, eliminat: et plurima virtutum, quibus Deo placeat, incrementa converget: ita ut quodammodo facultates adimat delinquenti, et bonis operibus insistendi vim necessitatis imponat. Quod nimurum qui non deditur inquirere, in aliis nostræ parvitatis opusculis valet expressius invenire. Huic ergo sanctæ, et, ut vere fatear, viviscae vitæ illud non incongruenter aptatur, quod per Salomonem dicitur: « Multæ, inquit, filiæ congregaverunt divitias, et tu supergressa es universas (*Prov. xxxi*). »

## CAPUT II.

### *De origine vitæ eremitice.*

Verumtamen rei ordo postulat, ut antequam ramos conversationis attingam, ipsam radieis originem solerter inquiram: et qui hujus institutionis auctores fuerint, evidenter expediam. Dignum sci-licet arbitror fontem prius aspicere, ut post securius valeam rivos haurire.

Hujus itaque vitæ normam, ut anteriora præteream, in Veteri Testamento Elias cœpit; Eliseus vero aucto discipulorum collegio dilatavit. In Novo autem Paulus et Antonius non dissimili ab his invicem proportione creduntur. Dum constet juxta fidem gestorum quod et Paulus in eremo singulatiter vixit, et plures Antonius in hac professione discipulos enutrivit. Quanquam et hoc certe non lateat, quod et Moyses sub ipso tunc promulgatae legis initio quadraginta annis populum per deserta ductaverit (*Exod. xxiv*); totidemque diebus ipse

A Redemptor noster, illucescente jam videbet Evangelii gratia, eremum consecravit. Teste Marco, qui post enarrationem baptismi, præsto subintulit: « Et statim Spiritus expulit eum in **332** desertum, et erat in deserto quadraginta diebus, et quadraginta noctibus, et tentabatur a Satana, eratque cum bestiis (*Març. i*). » Baptista quoque Joannes hujus professionis assertor non mediocriter exstitit, qui sine humano victu in deserto vivere non humana virtute decrevit (*Ibid.*).

## CAPUT III.

### *De duplice eremitarum genere.*

Quapropter et ex ipsa nascentis hujus institutionis origine, et posterorum deinde succedente processu manifeste colligitur, quod eremitarum ordo bipartitus est: quorum videlicet alii cellulas incolunt, alii passim per eremi deserta gradientes, certas aedes habere contemnunt. Sed qui per eremum spatiando discurrunt, anachoretæ; qui vero cellulæ contenti sunt, usitato vocabulo eremitæ dicuntur: quibus nimurum nomen commune factum est speciale. Quanquam hujus temporis fratres. superbum ducent hoscibimet arrogare vocabulum, sed humilitatis causa pœnitentes se potius gaudeant appellari. Anachoretarum autem jam tunc filii Jonadab primitiæ fuerant, qui, sicut Jeremias testatur, vinum et siceram non bibeant (*Jer. xxxv*). Habitabant porro in tentoriis, et quas nox compulerat, sedes habebant. Hi denique scribuntur in Psalmo (*Psal. cxxxvi*), quod primi captivitatem sint sub hujusmodi persecutione perpessi: quia ab exercitu Chaldaeorum vastante Iudeam, urbes sunt introire compulsi. Hac videbit ratione, quod oppida carceres ducerent, et dulcis habitaculi requiem deserti solitudinem aestimarent. Sed nos sanctis anachoretis, qui hoc tempore aut rari sunt, aut nulli, solam reverentiam exhibemus, ad eremitas autem omnem hujus disputationis articulum vertimus.

## CAPUT IV.

### *Qua diligentia resistendum carnis ac diaboli tentationibus.*

Quisquis igitur cellulam cum diabolo dimicaturus ingreditur, et in arena spiritualis prælii ferventis animositate pectoris incitatur, ad hoc totam suæ mentis intentionem dirigat, ut delectationem carnis, vel ad momentum quidem jam ultra non sentiat; sed sibimet, simul et mundo mortuus vivat. Ad tolerandas itaque calamitates, atque miserias animum præparet, morti se pro Christo devoveat, diversis virtutum telis lumbos mentis accingat; omnia sibimet aspera, et dura præponat; ut cum acciderint, non improvidus enerviter concidat, sed omnia æquanimiter ferat. Plane sicut fluvius ex sui fontis origine per exiguum oritur, sed processu longioris declivi, rivis hinc inde confluentibus dilatatur: sic interior noster homo in sanctæ conversationis itinere tenuis, et velut aridus incipit: paulatim vero per incrementa virtutum quasi rivis undique concurrētibus convalescit.

Quisquis ergo nititur amnis fluenta restringere, juxta fontis aditum, necesse est satagat obstacula convectare: ut ubi nondum amnis, sed **333** adhuc rivulus cernitur, illuc obicibus impeditis facile reprimatur. Qui ad aulam quoque regiam properare disponit, in ipso demum expeditionis exordio cum paucis egreditur: confluentis autem subinde numerus societatis augetur. Quisquis denique huic struit insidias, non procul a domo, unde egreditur, latitat: ut necdum constipatus multitudine commenantum repentinis impetus non evadat. Tunc autem veraciter ad regem nostrum properantes iter incipimus, cum rudes adhuc, novique tirones in spirituali militia sacramenta juramus. Sed quia neandum spiritualium studiorum agmine circumfundi-  
mur, neendum perfectionis virtutibus roboramur; tunc veternosus hostis ante ipsum egressionis nostræ vestibulum insidias præparat, ibi versutiæ suæ dolos, ibi malignitatis artes et laqueos, ibi deceptio-  
num machinas, et omnia pestiferæ calliditatis argumen-  
ta concinnat: quatenus rivum adhuc tenuem boni operis obstrual, et gradienter, antequam com-  
meantium agmine fulciatur, extinguat.

Sed inter has jaculorum crebrescentium grandines, inter istas bellorum ingruentium tempestates, Christi miles non formidine contabescat, non frāctus labore deficiat; sed invictæ fidei clypeo præmu-  
nitus, quo acriora infestantium luctatorum certamina tolerat, eo certius de vicina Dei auxiliantis aspira-  
tione confidat. Nec prorsus addubitet, quia si primæ tentationis articulum illæsus evaserit: paulo post roboratus, et validus, tergā vertentibus ac succumbentibus suis adversariis, prævalebit. Idecirco nempe insidiator spiritus totum fel suæ nequitiae circa novi-  
tios evomit. Ideo omne virus artificiosæ ac deceptoriæ calliditatis effundit: quia non ignorat, quoniam si tunc effectum perversi conatus amiserit, opportu-  
nitatem lædendi postmodum non habebit. Imo qui supplantare non potuit, ruinæ postmodum turpiter subjacebit; et qui rudi non prævalet, exercitato suc-  
cumbet.

#### CAPUT V.

*De quiete, silentio, et jejunio, eremitiis præcipue necessariis.*

Notandum autem, quia cum omnibus ad æterna festinantibus universæ vitæ animi sunt habendæ, solitariæ vitæ proposito tria sunt præcipue exteriora videlicet, congrua speciali præ cæteris observatione tenenda: quies scilicet, silentium, atque jejunium: et cætera quidem instrumenta justitiae in sola plenaria devotione, vel habitu; ista autem in exercilio debent familiari quadam sedulitate versari. Sicut enim sacerdotis est proprium sacrificiis offerendis insistere, doctoris est prædicare; ita nihilominus eremitiæ officium est, in jejunio, silentioque quiescere. Unde non frustra reperitur ab antiquis vitæ hujus institutoribus dictum: *Sede in cella tua, et retine linguam tuam, et ventrem, et salvus eris.* Venter siquidem reprimendus est, ne dum ipse im-

A moderate repletur cibis, cætera quæque membra inficiat vitiis. Lingua vero restringitur, quia indisciplinate laxata, supernæ gratiæ vigore animam vacuat, **334** et a statu salutiferi rigoris enervat. Verumtamen modus atque discretio in talibus est adhibenda; ne quod indifferenter agitur, vclut onus importabile, per intolerantiam pusillanimiter deponatur. Sicut ergo supra promisimus, quæ in hac eremo vivendi regula teneatur, breviter explicemus: ut dum hanc quasi quoddam vivendi metrum considerationis tuæ oculis apposueris, sive excedens, sive inferius gradiens, ad hanc sedula intentione recurrens, errare non possis.

#### CAPUT VI.

*Regula jejunii ac refectionis.*

B Ab Idibus itaque Septembribus usque ad resurrectionem Dominicam, quinque per hebdomadam diebus tenetur hic ex more jejuniū. Ab octavis autem Paschalis festivitatis usque ad sextum diem Pentecostes, quatuor tantum per hebdomadam diebus jejuniū celebratur. Hac videlicet discretione servata ut propter Dominicum diem, de cuius speciali reverentia nullus addubitat, etiam tertia et quinta feria bis in die reficiant fratres. Illo enim tempore licet aliquanto remissius vivere: tametsi minime prohibeantur monachi auctoritate sacerorum canorum jejunare. Ab octava vero Pentecostes usque ad Nativitatem B. Joannis, tertia quidem feria pulmentum fratribus hora nona tribuitur, quinta vero feria refectione iteratur. Porro a festivitate S. Joannis usque ad Idus Septembribus, tertia et quinta feria bina refectione in die teneatur: reliquis vero quatuor diebus jejuniū ex more servetur. Salvo videlicet eo, quod si quis inter fratres infirmari conspicitur, mox illi, prout necesse fuerit, misericorditer subvenitur. In festivitatibus duodecim lectionum, quæcumque veniunt ab Idibus Septembribus usque ad Resurrectionem Domini, semel tantum reficiant fratres; exceptis videlicet his solemnitatibus, omnium sanctorum, S. Martini et S. Andreæ, hebdomada-Natalis Domini, et uno die Epiphaniæ, et Hypopanti. Quibus nimirum diebus iteratur pro more refectione. In cæteris autem festivitatibus una tantummodo sint refectione contenti.

D Notandum autem, quia non omnes, quæ in monasterio, etiam in eremo celebrantur festivitates. Et hæ quæ illuc sunt, plerumque transmutantur, ut aut in tertia, aut in quinta feria celebrentur: exceptis nimirum præcipuis festivitatibus, quæ ob reverentiam dignitatis mutari non possunt. Plerasque autem festivitates, quæ non adeo sunt præcipuae, sive in quadragesimali tempore, sive per totius anni curriculum, cellararius cum his qui iuxta ecclesiam commemorantur, cum duodecim celebrent lectionibus: atque si priori videtur, aliqua illis, rarissime tamen, misericordia refectionis impendatur. Cæterum ii qui per diversas sunt cellulas constituti, dum foris minime prodeant, trina lectione contenti, jejuniū ex more conservent. Jejunare autem illos dicimus,

qui per nem cum sale et aqua percipiunt. Ubi præter hæc alud quid additur, in eremo jejunium non vocatur. Duabus autem illis quadragesimis **335** quæ vel Natale Domini, vel sanctum Pascha præcedent, nonnulli fratres hic sunt, qui totam hebdomadam jejunando transcurrunt; et quotidie, exceptis Dominicis, in pane et aqua vivunt. Quidam etiam fratres in utriusque quadragesimæ non solum quibusque festivitatibus, sed et Dominicis diebus coquibus abstinent. Quod nos in Dominicis diebus primo quidem propter excellentiam sanctæ Resurrectionis curavimus prohibere, sed rursus coacti sumus fraterna supplicatione permittere. Vescuntur autem pomis, et herbarum radicibus, ac leguminibus infusis, vel etiam elixis.

Nec illud plane silenter omittimus, quod in quadragesimæ utriusque principio omnes monachi, nec non et laici triduanum jejunium districte conservant: ita ut qui a percipiendis alimentis omnino se compescere nequeant, solo tamen pane sūmul et aqua contenti vivant. Est autem consuetudo fratribus omni tempore duo in Dominicis diebus habere pulmenta, propter duas scilicet quadragesimas superius nominatas: in quibus per omnes, et Dominicas videlicet, et sanctorum festivitates, uno duntaxat probantur esse contenti. Cæteris autem diebus, quibus nimirum temperato jejunio remissius vivunt, si bis in die comedunt, duo illis pulmenta sūnt, prandientibus unum, coenaturis alterum exhibendum. Sin autem una sit refectione tantum, unum sit nihilominus et pulmentum. Quod autem in Dominicis diebus duo hic fieri solere pulmenta meminimus, constat extra eremiticam regulam idcirco fuisse permisum, quia perraro huc ab extraneis oblationibus deferatur exenium. Cæterum ubi locus frequentatur devotione fidelium, cessat procul dubio geminatio pulmentorum.

Unde sit ut in illa eremo, quam auctore Deo in latere Suavicinii montis ipsi construximus, pulmentum præter unum, cunctis æque temporibus penitus ignoretur. A vino autem aliquanto tempore continuimus, ita ut neque laici, neque extrinsecus venientes, vel etiam in Pascha Domini aliquid hic præter aquam liberent: neque vinum hic, nisi pro sacrificio haberebantur. Sed quoniam et hic manentes cœperunt ægrotando desicere, et quidam ad eremiticam vitam transire cupientes, hujus rigoris observantiam videbantur penitus abhorrere, fraternæ, sive, ut verius dicam, communi imbecillitati dispensatorie condescendentibus indulsimus, ut vinum servato sobrietatis moderamine biberetur. Ut quod cum Joanne non possumus ex toto relinquere (*Luc. 1.*), saltem cum Timotheo Pauli discipulo meminerimus infirmo stomacho parcere, et humiliter ministrare (*Timoth. 1.*); et qui prorsus abstemii esse non possumus, esse saltem sobrii studeamus. Verumtamen in prædictis duabus quadragesimis consuetudo tenuit, ut neque monachis, neque laicis vini, vel etiam piscis perceptio concedatur: exceptis his quatuor festivita-

tibus, sancti scilicet Andreæ, B. Benedicti, et Dominica palmarum, et Cœna Domini: quibus nimirum sacratissimis diebus pisces, et vinum excellentium solemnitatum lætitia invitante percipiunt. In Sabbato autem sancto, nec non et vigilia Natalis Domini, ut labor ecclesiastici relevetur officii totum panem, **336** qui voluerint, comedunt: aliud vero cibum, sive laici, sive monachi penitus non admittunt. Tres autem solummodo octavæ per annum ita celebrantur, ut jejunare hic nemo cogatur, id est Dominicæ resurrectionis, et sanctæ Pentecostes, atque Natalis Domini. Sed quibusdam, quia propter desuetudinem grave est totius hebdomadæ binam continuare refractionem, quoniam quidem hoc humiliter expetunt; jejunare aliquantulum pro misericordia conceduntur: quanquam in octavis Pentecostes et ecclesiastica traditio, et Patrum decernat auctoritas jejunandum. In reliquis vero octavis quarumlibet festivitatibus, ecclesiasticum quidem, prout regularis ordo postulat, tenemus officium, tenorem vero consueti jejunii non mutamus.

## CAPUT VII.

### *De servorum disciplina.*

Ut autem tota domus Dei sub regulari custodiâ, et disciplina teneatur, et unumquodque membrum operetur in corpore, juxta suæ proprietatis officium, famuli quoque, qui huic loco deserviunt, ab assignato sibi vivendi ordine non recedunt: qui nimirum per totius annalis spatii cursum tribus per hebdomadam diebus tenent ex more jejunium. In illis autem duabus quadragesimis quatuor dies jejunio dedicant, exceptis his, qui in viam longius diriguntur. Porro quoquaque prodeant, omni tempore carnis non vescuntur: proprium etiam aliquid habere nihilominus, sicut et monachi, prohibentur. Nonnulli quoque ad audiendi Psalterii vigilias maturius surgunt, cum his videlicet fratribus, qui apud ecclesiam commorantur. Promissionem autem ingredientes hanc faciunt: *Ego frater N. promitto obedientiam et perseverantiam omnibus diebus vitae meæ in hac eremo, quæ est ædificata ad honorem Dei, et sanctæ Crucis; pro timore Domini nostri Jesu Christi, et remedio animæ meæ. Quod si aliquo unquam tempore hinc fugere, vel abire tentavero; liceat servis Dei qui hic fuerint, me plena sui juris auctoritate requirere, et coarcte ac violenter in suum servitium revocare.* Scriptæ ergo huic promissioni signum crucis ipsi præfigunt: et ab aliquo fratre coram omnibus lectam ponunt super altare. Monachi autem nullam promissionem faciunt, præter eam tantum, quæ in monasteriis fieri consuevit; solo duntaxat eremi nomine permutato. Enimvero et monachis et laicis introire volentibus, omnia dura et aspera proponuntur: videlicet extremitas, vel etiam nuditas vestium, penuria ciborum, propriæ voluntatis avercio, durissimæ correptionis asperitas, contumeliae, reprehensionum, laboris, et assiduæ fatigationis instantia. Hæc, et hujusmodi multa, quæ nimirum nos idcirco prosequi, et enumerare negligimus, quia hæc

eadem in monasteriis fieri regulari traditione me- A  
minimus.

### 337 CAPUT VIII.

#### *De panis mensura, et spiritualibus exercitiis.*

Panis autem eadem in eremo, quæ et in monasterio est mensura, hæc tamen discretione servata, ut in diebus quidem refectionis sive singulæ, sive binæ, si totum vult frater comedere, reprehensioni non cogitur subjacere. In diebus vero jejuniæ, quia unusquisque frater lances habet in cella, illis semper librat, quod sibimet cœnaturus apponat. Mensura autem illa hunc habet modum, ut superaddito quadra dimidio dimidium buccellæ totius appendat: quadra videlicet remanente integra semis. Et ut nulla dubietas super hujusmodi mensura remaneat, novem ornicum, vel tria anserum ova libratis lancibus tantumdem pensant. Et de jejuniis quidem, et de mensura ciborum ista sufficient.

In cæteris autem spiritualis exercitii studiis, quæ sit hic continui fervoris instantia, quæ sollicitudo, quam vigil et operosa frequentia, timeo scribere; ne et meipsum forsitan eis cohabitantem, etsi non cooperantem, vana videar elatione jactare. Hoc tantum mihi dicere liceat, quia non párva hic diligentia est in flexionibus genuum, in disciplinis scoparum, et in cæteris hujusmodi: quæ nimirum, frater charissime, quia eorumdem hæc satagentium vivis vocibus clarius potes addiscere, non expedit hic omnia litteris adnotare.

### CAPUT IX.

#### *De psalmodia.*

De psalmodia vero hæc consuetudo est, ut cum duo simul commorantur in cella, duo persolvant in die Psalteria; unum pro vivis, alterum pro defunctis. Et illud quidem quod est vivorum, cum illis dicitur additamentis, quæ B. Romualdus apponit, quæ etiam nos non gravemur inserere; ne nos conqueratur forte novitus, quæ sibi magnopere noscenda sunt, præterisse. Decursis plane quinque psalmis, protinus subinfertur: *Gloria tibi, Trinitas, æqualis una Deitas, et ante omne sæculum, et nunc et in perpetuum. Orate pro nobis, omnes sancti Dei, ut digni efficiamur promissionibus Domini Dei nostri Jesu Christi. Pater noster.* His expletis, mox subditur: « Adjutorium nostrum in nomine Domini, qui fecit cœlum et terram (*Psal. cxxiii*). » Et evolutis aliis quinque psalmis, tunc dicitur: *Te Deum Patrem ingenitum, te Spiritum sanctum paracletum, sanctam et individuam Trinitatem, toto corde et ore confitemur, laudamus, atque benedicimus, tibi gloria in sæcula. Amen.* « Domine Deus, in adjutorium meum intenue, Domine, ad adjuvandum me festina. Confundantur, et reverentur inimici mei, qui quærunt animam meam. Adjutor meus, et liberator meus este, Domine, ne tardaveris (*Psal. lxix*). » *Gloria Patri, et Filio, et Spiritui sancto.* Quo finito rursus dicitur: *Adjutorium nostrum in nomine Domini.* 338 Hæc igitur per quinque nos psalmos alternatim semper adduntur, donec Psalterium cum tribus Domi-

nicalibus, nec non et totius hebdomadæ canticis expleatur. His etiam non neglectis, quæ in fine Psalterii videntur adjecta, videlicet, *Te Deum laudamus; Nunc dimittis, Domine, servum tuum;* duobus symbolis; *Gloria in excelsis Deo; Pater noster,* cum fide catholica; postremo litaniæ cum orationibus hæc omnia consueto fine concludunt. Psalterium vero pro defunctis cum novenâ lectionibus dicitur, tribus nimirum per quinquagenos psalmos: qui autem solus moratur frater, Psalterium quidem vivorum totum per singulos dies adimplet; defunctorum autem sive medium, sive totum, juxta quod virium possilitas administrat. Horarum autem psalmodia canonica omnino sicut in monasterio, ita hic per ordinem nihilominus tota persolvitur.

### CAPUT X.

#### *De silentii rigore*

Hoc autem inter cætera prætermittendum non est, quia in cellulis continuum tenetur, sicut revera in oratorio, ex more silentium: nec permittitur, ut illic alter alterum vel pro confessione loquatur, excepto si priori visum fuerit, ut novitiis, eorumque insitutoribus ad tempus aliquantulum loquendi licentia concedatur. Si quid autem loqui indigent, ad Ecclesiæ prodeentes, quæque sunt necessaria, manifestant. Est enim revera, ut experimento cognovimus, animarum magna destructio, ubi passim fieri colloquium in cella permittitur. Nam dum infirmi quique fratres, qui sub confessionis specie se invicem visitant, breviter explent quod cœperant, ad alia se mox

C frivola et otiosa, data semel procaci linguae libertate dilatant: et oblii repente quare convenerint, mox fratibus suis, vel etiam prioribus detrahunt: et quos amare sinceriter, et pure debuerant, dente, ut ita loquar, livido mordaciter rodunt. Deinde ad sœcularia transeunt, et quidquid est, quod in urbibus agitur, de eo in cellula disputatur. Needum id ad aures vulgi fama pertulit, unde plerumque monitionum jam secreta complevit. Adde, quod absentibus arbitris, quanto reprehensionis securiorcs sunt, tanto, quidquid linguae confluerint, liberius fundunt. Sicque fit, ut qui purgandi sese causa convernerant, cumulato linguae contagio a se invicem soridiores abscindant.

### CAPUT XI.

#### *De monasticæ institutionis observatione.*

Illud etiam non minima pars poenitentiae est, quod omni tempore sive æstate, sive hieme non calceis, non ocreis utuntur in cellulis; sed nudis semper cruribus, et pedibus consuetudo est permanere, exceptis his, qui graviori molestia infirmitatis urgentur. Regulare autem est monasteriis (S. BENED. *Reg. cap. 51*), ut ii, qui in viam diriguntur, foris non comedant, si eo die sperant 339 reverti. Cui videlicet observantiæ illud etiam apud nos additur, ut sive ipso, sive alio die fuerit quis egressus, exceptis præcipuis festivitatibus, jejonus semper ad eremum revertatur: sin alias poenitentia non deerit.

D De cæteris vero monasticæ institutionis observa-

tionibus, quidquid in regulari et districto monasterio tenetur, idem etiam hic caute et solerter nihilominus custoditur: videlicet de promptissima obedientia, ut quocunque præcipitur, humiliter et serventissime peragatur; de non dando, vel accipiendo sine jussione prioris, de proprio non habendo; ut dum sunt in claustrō, quod est iuxta ecclesiam, sive in festis diebus, sive omnibus incompetentibus horis silentium teneant; ut in capitulo, in oratorio, in refectorio regularem consuetudinem non postponant; ut cum hospitibus non loquantur; atque ideo a cellulis usque ad ecclesiam sive venientes, sive redeentes, a censura silentii non recedant (S. BENED. Reg. cap. 5, 53, 54; 5, 55, 42, 52 et 53): enumerare postponimus, quia laciniosi styli fastidium devitamus.

## CAPUT XII.

*De pietate erga defunctos.*

Illud etiam silentio præteriri dignum esse non ducimus, quia cum frater quispiam ex nostris obierit, qui videlicet nobiscum degunt, pro eo unusquisque septem dies jejunat, septem disciplinas cum millenis scoparum ictibus accipit, septingentas metaneas facit, triginta insuper Psalteria ex more deuantat, et unusquisque sacerdos septem missas illi pro sua persona persolvit, salvo eo, quod continua quoque triginta diebus pro eo missarum solemnia in conventu communiter celebrantur. Hæc igitur hujus loci regula nulla voti varietate postponitur; hæc consuetudo circa defunctos districta prorsus, et inviolabili semper observatione tenetur.

Si autem quis foras novitus, vel quolibet modo injunctam pœnitentiam morte præventus consummare non potuit, mox ut ad fratrum notitiam res patetfacta pervenerit, cum magno fervore tota pœnitentia, parili facta inter eos divisione suscipitur: et quantalibet sit, brevi spatio per diversos afflictionis modos ovanter expletur. Pauca igitur de ea, quæ nunc est, hujus eremi conversatione sufficient: ut per hæc, quæ breviter adnotantur, valeat colligi quid ex his, quæ silentio prætermissa sunt, debeat. aestimari.

## CAPUT XIII.

*Adhortatio.*

Hæc itaque, dilectissime fili, quæ de fratrum nostrorum tibi conversatione protulimus, diligenter intuenda præ oculis pone; vires etiam tuas velut in statera districtæ examinationis appende: ut sive subsidias, sive magis emineas, dum triti metam jugiter contemplaris itineris, per anfractuum diverticula prorsus oberrare non possis. Nam et pictor imaginem compilationis gratia sibimet pro scheda constituit, qui tamen ad mensuram tabulæ, quæ versantur in manibus, omnia redigit, et huic coaptata mutuati operis libramenta componit. Tu etiam nihilominus juxta modum virium, quem tibi cœlestium charismatum Largitor infuderit, hæc tibi sic in exercitium arripe, ut noveris, quantum cogaris ex necessitate minuere, vel quantum hæc in te per accessum gratiae possis augere. Nonnulli nempe totam

A hebdomadam jejunando facile transigunt, quidam vero etiam bidui jejunium molestissime ferunt: sed in his exhibendis non dispar meritum uterque sortitur, et robustus videlicet, qui fortia peragit; et debilis, qui ea, quæ prævalet, minima non relinquit.

Quapropter difficile est definitivam communemque regulam super jejunis constituere, ne cogere videamur vel fortiores a sua perfectione languescere, vel debiles viribus suis majora tentare: *Unusquisque enim proprium donum habet ex Deo, alius sic; alius autem sic.* Nam et apud antiquos Patres nostros, plerosque legimus exstitisse, qui etiam simul in communi congregatione viventes, non communem vivendi regulam tenuerunt. Vires ergo suas unusquis-

B que considerans, non semetipsum inaniter fallat: non se simulata debilitate decipiat: sed prout videbit se posse, sub sobrietatis legibus, et abstinentiæ se rigore constringat.

## CAPUT XIV.

*De iis qui arctiori vivendi genere se obstrinxerunt.*

Porro et inter nos quoque nonnulli fratres sunt, qui longe alia, quam hic scriptum est, via conversationis incedunt, et arctiori se non minimum vivendi lege constringunt. Alii siquidem nullo unquam tempore vinum bibunt, vel acetum quoniadolibet hauriunt: alii vero ovis, lacte simul et caseo, suina quoque pinguedine non vescuntur; plerique mattarum velut mollia strata despiciunt, et papyrinis ad quiescendum contenti sunt storeis, ita ut palearum quoque stramenta subjici prorsus abhorreant: ali asperrima quæque cilicia tanquam mollia, ac delicata indumenta contemnunt, et loricis ad carnem ferreis induuntur. Non deest, qui totius anni tempore per singulos non modo communes, sed etiam festivos, atque Dominicos dies, dimidio sit pane contentus. Hic idem frater per integrum et dimidium circiter annum quinque diebus hebdomadæ cibum non tetigit, solis autem Dominica, et quinta feria comedere contentus fuit. Nunc etiam Dominicis diebus, et quinta feria post horam videlicet nonam sic uno pulmento reficitur, ut secundum prorsus ignoret.

Est etiam qui continentia et sobrietatis amore non modo pomis, sed et cæpis et porris, cunctis videlicet herbarum acrumenibus se decreverit abstинere. Et qui utroque quadragesimali tempore singularis quibusque diebus, alliis geminato pugillo cicoris vivat, quinta vero feria semper, tertia autem raro panem solummodo comedat. Hic etiam lumbos suos ferrea 340 semper catena circumdat, ne quando modum so'rie refectionis excedat.

Confessus est mihi quidam ex senioribus nostris, quia cum solus in cella comedaret, non sibi iuxta pruritum famis alimenta citius indulgeret, sed remorando, ac protrahendo, raro videlicet, atque minutius micas potius quam frustra panis in os mitteret, et sic se inter ipsa corporis alimenta durius per inopiam cruciaret: ut ipse etiam cibus

non tam resloveret quā in poniret, et refectione potius A  
 v. eretur esse dēcentia defecatio, dum non dele-  
 etando reficeret, sed affligendo potius castigaret.  
 Corripui adolescentem nostrum indolis adhuc epe-  
 bae, acriori insuper verbere castigavi, quia can-  
 tabricii panis quadra vivebat in die, et ita vix  
 demum, ut ad medium usque relaxaretur, obtinui;  
 qui nimirum tunc ferrea loricatus interula a Do-  
 minico die usque in quintam feriam nullum peni-  
 tus cibum sumpserat, tribus vero rel' quis hebdo-  
 madæ die us solo pane vivebat. Habemus inter  
 nos fratrem adhuc et ætate juvenculum, et con-  
 versione novitium, qui totum implere Psalterium  
 extensis in altum brachiis consuevit; per quinqua-  
 genos videlicet psalmos brachia fatigata deponens,  
 sed antequam vel unum productiorem psalmum B  
 decurrere valeat, iterum subrigens. Habemus et  
 alium incurvum jam senem, qui duo Psalteria sub  
 una brachiorum extensione decantat: unum vide-  
 licet cum canticis et litaniis, multisque orationibus;  
 alterum vero pro defunctis cum novem le-  
 cionibus.

Dicam, sed quis sciat, utrum fides assertioni fi-  
 delissimæ præbeatur? Sed parvipendendum est,  
 si humana temeritas arguat, quem summa Veritas  
 falsitatis excusat. Idem senex, Dominicus nomine,  
 nonnunquam uno die continuato cum nocte, novem  
 Psalteria meditando decurrit, et interim pene sem-  
 per utraque manu scopis armata nudum corpus  
 afficit. Notandum autem, quia dum peragere satagit,  
 nocte, vel die sibi dormire non vacat, sed aliquando  
 genua flectens, dum caput terræ deponit, sic nudo  
 repente somnus obrepit, quo videlicet solo con-  
 tentus est. Hic mihi aliquando fraterna familiari-  
 tate conquestus est, quia cum novem sic Psalteria  
 sepe molulando perficeret, ad decimum nunquam  
 potuerit pervenire. Novi fratrem, qui se fatiget  
 toties psallendo genua flectere, quot in se ver-  
 sus totum Psalterium contineret; cum videlicet  
 Psalterium quatuor sere millia versuum habere di-  
 catur, sicut asserunt qui supputandis operam de-  
 derunt.

Sed et hæc prolixius idecirco non prosequor,  
 quia et eos, de quibus loquer, offendere timeo:  
 et illis cohabitare, quibus non cooperor, aliorum-  
 que narrare fervorem frigidus erubesco. Dignum  
 autem credo robustis ac perfectioribus viris ista  
 relinquere: sed et hæc ipsa mitiora quæ superius  
 scripta sunt, aliquantis per sub modesto discretionis  
 libramine temperare; ut dum valentiores quique  
 per altum virtutum pelagum citato servent remigio  
 eurrere, imbecilles etiam littoris vicina secantes,  
 non compellantur hærenti lembo in arenosis syrtibus  
 remanere.

### 342 CAPUT XV.

#### *De eremitarum jejunio.*

Verumtamen ne quod scribimus, prorsus a regulæ  
 solutum lege nutare videatur, credimus unumquem-  
 que fratrem in cellula commorantem, nisi omnino

aegrotus sit, ita ut decumbat quidem in lectulo, toto  
 anni tempore, sive æstate videlicet, sive hieme,  
 tribus per hebdomadam diebus jejunare in pane et  
 aqua cum Dei adjutorio facilime posse: et quoniam  
 Sabbato jejunare etiam canonicæ traditionis authen-  
 ticum est, non grave videatur fratri etiam Sabbato  
 refectionem ad nonam horam usque differre; ut se-  
 mel quidem ipso die reficiatur, sed tamen vinum  
 atque pulmentum percipere ex hujus nostræ institu-  
 tionis indulgentia non vetetur. Et hoc quidem  
 æstate. Nam ab Idibus Septembribus usque ad Paschale  
 gaudium, quatuor per hebdomadam diebus neverit  
 jejunandum: sed etsi aliquando tanta debilitas acci-  
 derit, hiberno etiam tempore die Sabbati aut legumi-  
 nibus infusis, aut herbarum radicibus, sive etiam  
 pomis solitum licebit aliquantis per temperare jeju-  
 nium. Ita tamen ut si unum quodlibet horum sumat,  
 aliud, nisi veræ necessitatis causa dictaverit, non  
 adjiciat. Postremo tamen propter pusillanimes, si hic  
 necessitas omnino poposcerit, quæ sieri permissa  
 est in æstate, eadem Sabbatorum discretio servetur:  
 in hieme.

C De festivitatibus quoque, quæ hiemali tempore  
 celebrantur, in quibus nos asseruimus semel in diæ  
 solere comedere, liceat geminare cibum, sicut mos  
 est cœnobitarum. Porro in duabus quadragesimis,  
 videlicet, quæ Dominicam Nativitatem, Resurrec-  
 tionemque præcedunt, tertia quidem feria, et quinta  
 pulmentum sumat; Dominicis autem diebus et præ-  
 cipuis festivitatibus, addita insuper quinta feria,  
 etiam vinum bibat. Pulmento autem uno quadrage-  
 simali tempore contenti sint fratres, quando semel  
 reficiunt; quando vero refectionem geminant, alte-  
 rum prandentes, alterum cœnantes accipiunt. Reli-  
 quo autem anni tempore duo semper habeant. Domi-  
 nicis quoque diebus, et majoribus festivitatibus, si  
 facultas affuerit, etiam tertium non negamus.

### CAPUT XVI.

#### *Discretio prælati in moderandis subditis.*

D Discretionem tamen debilium in prioris arbitrio  
 ponimus, nimirum ut ipse possibilitatem uniuscu-  
 jusque consideret: et prout cuique viderit expedire,  
 pie illis alimenta dispenset. Nam et nos approbamus,  
 quod suis sæpe discipulis B. Remualdus dixisse per-  
 hibetur: Dummodo, inquit, frater quilibet cellam  
 non deserat, etiam carnes permittatur ex discre-  
 tione comedere, si tam inevitabilis videatur necessi-  
 tas imminere. Addebat insuper: Tale enim prope-  
 modum est de eremo ad monasterium reverti, quale  
 de monasteriali ordine ad sacerdolum asportari. Unde  
 necesse est, ut 343 quicunque eremiticæ præest  
 fraternitati, robur cujusque diligenter examinet, et  
 juxta virium facultatem necessaria subministret. Et  
 quidem si omnes sub unius regulæ mensura vivere  
 prævalent, optimum est; alioquin si unus, aut for-  
 tas plures indigent, quod ii, qui incolumes sunt  
 necesse non habent, clam videlicet, et occulte sic  
 infirmis pia exhibeat humanitas, ut valentes sine  
 invidiæ stimulo in sui rigoris permaneant disciplina.

Neque enim necesse est, quod unī casus irrogat, illico regulare omnibus fiat: cum et idem frater, qui hodie subveniri sibi per humanitatem postulat, secunda fortassis confortatus hebdomada, ejusdem humanitatis impendia non requirat. Nam et idem B. Romualdus, ut sui consueverunt referre discipuli, sic æstivi temporis hebdomadas alternabat, ut una quidem a Dominicā in Dominicam in pane et aqua jejunando transigeret; alterius vero hebdomadæ pulmentum quinta feria manducaret. De conversis quoque quantum jejunent, ejusdem prioris provideat diligentia.

## CAPUT XVII.

*De somni ratione.*

De somnō quoque non tam dura quibusdam di- strictio quam modesta discretio necessaria est. Me- lius quippe est somnum carni temperata quadam dispensatione concedere, et ferventer postmodum in Dei laudibus excubare, quam summoienus soporatum dissolutis tota die labiis oscitare. Enimvero nuperrimis etiam prædecessoribus nostris consuetudo non erat, ut aliquo tempore dormirent in die; nos autem æstivis diebus dormimus quidem, sed ut indubitanter experti sumus, quidquid proiectus in die dormientes amittimus, hoc et maturius nocte surgentes, et expeditius divinis insistentes obsequiis compensamus.

Notandum autem, quia ante nocturnæ synaxis officium, si vel profundior adhuc nox, vel quolibet modo graves videntur esse vigiliæ, repetere accubitum licet: post nocturnum autem omnino non licet. Unde nos, ut hæc regularis observantia posset facilius custodiri, hoc instituimus, ut quotidie signum primitus ad vigilias sonet, deinde expleto ex more Psalterio, vel quantum ratio temporis considerata permittit, sonante iterum signo, nocturnale peragatur officium: ut juxta diluculum, quo videlicet tempore gravius incumbit accidia, stantes nos et canonici inveniat occupatos officiis. Absit enim tunc nos sopori vel ignaviae cedere, qua videlicet hora constat Redemptorem nostrum destructo mortis imperio surrexisse; ne si tunc dormiamus, quando oriente solo corporeo, etiam interior noster homo lucem debet inocciduam exspectare, quod absit, irrisio nobis videatur illa congruere: « Discipuli ejus nocte venerunt, et nobis dormientibus, furati sunt eum (Matth. xxviii). »

Cavendum est autem, ne somno quis vel ad momentum quidem incompetentiibus horis assentiat. Nam si sedenti quidem, vel etiam stanti frequenter obrepserit, postmodum cum dormire voluerit, 344 ab ejus oculis sopor abscedit. Sic nimirum dormitatio vigiliam, et vigilia dormitionem parit: cum et qui dormitat, invitus postmodum vigilet, et rursus qui diutius vigilat, ex necessitate dormitet. Cui similem etiam indiscrete comedentibus saepè contigit. Hinc namque est, quod nonnulli ridicule delirantes, superfluo conqueruntur se cœnare non posse, quod certe ex immoderati-

A ingluvie prandii manifestum est provenire. Nam si frugalitatis metam in prandio non excederent, vesperinam mensam non tantopere fastidirent. Ut ergo cœnare quis valeat, ac mox quiescenti sopor incumbat, et sobrie prandeat, et dormitionis ignaviam non admittat. Nonnulli autem, quod prætereundum non est, ut nocte securius dormiant, et usque ad satietatem longis profundi soporis stertitionibus intumescant, dum adhuc dies est, psalmodiam anticipare festinant: quibus nimis districte prohibendum est, ne antequam suo tempore Completorium dicant, psalmos incipiant.

## CAPUT XVIII.

*De psalmodia privata ac publica, nec non aliis exercitiis.*

Psalterium autem unusquisque frater quotidie unum decantet, si vero pro defunctis vult addere vel totum Psalterium, vel medium, sive saltem tertiam partem, aut ex toto dimittere, ejusdem fratris relinquatur arbitrio; dum tamen meminerit omnem psalmodiae ordinem, viventium scilicet et mortuorum, sicut in monasteriis actitatur, explere. Quatuor autem illis diebus, quibus jejunandum esse censuimus, silentium teneant, nisi forte necessitas superveniens aliter imperaverit. In ipsis autem cellulis nunquam loquantur alicui, nisi forte aut omnino morentur inclusi, aut etiam sint juxta monasterium constituti. Sed nec alium cum alio fratre sive de proprio conventu, sive cum extraneo præsumat aliquando simul in cella comedere, vel ad comedendum alios invitare, ubi nimis non licet etiam confessionem cum alio fratre verbis vulgaribus agere.

Si duo simul fratres in cella cohabitant, unus semper præsit, et alter obediat, juxta communis videlicet prioris imperium: quod si uterlibet eorum novitus est, semel, aut bis in hebdomada post vesperam colloquendi licentiam habeant: at postquam novitus esse desierit, a mutua deinceps collocutione cessabunt. A cellulis venientes, vel ad easdem redeentes, sicut superius dictum est, semper silentium teneant. Cum signum sonuerit ad congregandos fratres, quicunque intellexerit, non habeat licentiam, dum se præparat, remorandi in cellula, ultra quam quinque psalmos valeat decantare.

Caveat autem utilis frater, ne res suis necessitatibus deputatas, seu quilibet utensilia deterere præsumat, vel incaute tractare: utpote vestes, ferramenta, vasa, vel his similia. Præsertim libros sanctos ita custodiat, ut nunquam manum super litteras teneat, nunquam fumo nigrescere, vel ignis odorem [f. ardorem] 345 permittat. Ponat autem juxta se quæque sibi sunt familiarius necessaria, ut cum usum horum necessitas postulat, ipse ad exhibendum sibi frequentius surgat. Tantopere quippe vagatio est vietanda, ut nec per ipsam cellulam spatiari inaniter liceat. Porro si voluerit, calceis utatur in cellula.

Super metanoeis vero disciplinis atque palmatis, sive etiam brachiis extendendis in orationibus, ceterisque sancti fervoris exercitiis, nulla fratrem lege constringimus, quin potius suae committenda provisionis arbitrio judicamus. Sunt enim quibus horum aliqua non convenient, atque ideo tutum videtur, atque liberius, ut in talibus magis optio proponatur, quam definitiva regulæ sententia præscribatur. Rādant autem caput per menses singulos, exceptis quadragesim's duabus, quæ nimur sine lavacro capitum transigendæ sunt. Balneis vero si fuerint incolumes, non utantur. Hæc itaque nos remoto omni austерitatis rigore, ideo sub tam modestæ discretionis libra in re constituimus, ut frater, qui de sua est salute sollicitus, institutionem salutiferam non abhorreat: et tamen si hæc fecerit plenissime de omnipotenti Dei miseratione confidat. Verumtamen hæc regula post nostrum teneat obitum: nam dum vivimus, assuetum minui, Deo largiente, non patimur institutum.

Illud plane summopere est cavendum, ne sub colore quis eremiticæ vitæ jugum detrectet obedientiæ, imo tanto se auctiori obedientiæ lege constraintæ, quanto hanc institutionem superexcedere cœnobitarum regulam non ignorat. Sæpe enim frater de cella ad cellam jubetur habitaturus abscedere, nec aliquod utensilium, quæ suo etiam ipse labore paraverat, permittitur asportare. Sæpe optantes in remotione quiescere, ad peragendum opus compelluntur exire. Aliquando claves cellarum foribus subtrahuntur, et quam longo tempore nisi per singulos dies Dominicos non redduntur. Aliquando districtam sibi victimam continentiam indicentes coguntur remissius vivere; volentesque reficere, compelluntur e contrario jejunare. Sæpe post sagittarios frater procul ire præcipitur: sæpe distrahendi vel coemendi gratia ad nundinas destinatur. Sed hæc et alia quæcunque a priore mandantur, ita patienter, et humiliter sunt servanda, ac si fuerint divinitus imperata. Obedientia quippe et bona nostra commendat et negligentiae offensas excusat.

Ut ergo nostra sit remotio vel afflictio fructuosa, salutiferæ sit semper obedientiæ sale condita: et quæcunque boni operis vita nostra ramos expandat, in radice semper obedientiæ necesse est coalescat. Enimvero nos omnia hujus institutionis præcepta minutius non describimus, sed multa quæ et passim nobis occurunt, ex studio præterimus. Quidquid enim in B. Benedicti Regula, quidquid in institutis, sive in collationibus Patrum est dictum, huic competere disciplinæ perpendimus; tamen in unum hic cuncta colligere superfluum judicamus. Huc accedit quod ipsa cellula, et diuturna conversatio perseverantem efficaciter instruit, et per processum temporis rebus aperit 346 quod verbis perstrepentibus explicare carnis lingua non possit. Unde nos ex pluribus pauca, eademque breviter perstringendo transcurrimus, majoremque hujus sanctæ disciplinæ peritiam ipsi polissimum cellulæ reservamus. Perseveret enim

A tantummodo frater in cella; illa habitatorem suum omnem vivendi ordinem plenius edocebit.

#### CAPUT XIX.

*De cogitationibus vanis et nocuis non suscipiendis, vel expellendis.*

Nunc autem ex his quæ versantur in mente, pro styli compendio breviter disputemus; ut in spirituali certamine dimicantem adversus cogitationes proprias, et pugnas diversas quasi quibusdam telis insuperabilibus instruamus. In primis igitur, fili, quicunque manus ad confligendum paras cum invisi bili hoste conserere, satage mentem tuam ab omni suggestionum obrepentium impetu pervigili custodia communire: et sicut quisquilius, et quæque purgamenta, quæ de operibus manuum tuarum decidunt, in ignem protinus alijicis; ita nihilominus cogitationum tuarum motus in Deum projice. Et quoniam ipse ignis consumens est, illi superflua cordis tui ad consumendum trade; memorans illud apostolicum: «Omnem sollicitudinem vestram projicientes in eum, quoniam ipsi est cura de vobis (Hebr. xii; I Petr. v).» Et Propheta: «Jacta, inquit, cogitatum tuum in Domino, et ipse te enutriet (Psal. LIV).» Unum quippe viriliter decertanti e duobus deesse non poterit: ut videlicet suggestionibus, aut ingredi tentantibus vigil semper obsistas, aut ingressas eliminare contendas. Sed facilius est hostiles impetus in vestibulo frangere, quam admissos extra mœnia propulsare: tutius est arcere præ foribus, quam labibus intromissos in terga compellere.

C Pone itaque temptationem quasi serpentem. Serpens nempe si ab ipso aditu præsto repellitur, saeva sunt omnia: nil omnino corruptitur, nil eorum, quæ intus sunt, inquinatur. Si autem semel fuerit admissus, tametsi quavis instantia postmodum cogatur abscedere, de veneno tamen ejus, vel squamis necesse erit aliiquid vel per exiguum remanere. Ergo sollicitus esto semper, ut temptationi principio nascenti velut armatus, et expeditus occurras (II Cor. x): et parvulos orientium cogitationum motus ad petram, qui est Christus, ailidas. Crede frequenter experto, sæpe certe temptationem quasi delibrantes admittimus, nobiscum videlicet primitus pacientes, quod eam quantocius egerenius: sed licet suggestionem illam postmodum per egressum confessionis emittimus, licet poenitentiæ nosmetipsos afflictione punimus, nescio quo pacto quibusdam pollutionis exclusæ reliquiis diu post carere non possumus; et justo iudicio, qui prius volentes vano phantasmate jactabamur, nolentes postmodum aceribus mordacis conscientiæ stimulis pungimur.

#### 347 CAPUT XX.

*De gula illecebris fugiendis.*

Et quia prima omnium gula adversus insipientes illecebrarum suarum consuevit arma vibrare, adversus hanc bestiam et ipse fervidus irruere, continentiae te telis accinge. Suadet illa ut modum refectionis excedas; tu tui corporis frenum tenens ad satiatem nunquam pervenias: suggestit forte lautiores

cibos appetere; tu post peractum manus, quo cibi reponantur, attende. Si enim digne perpendimus, ejusdem fere vesaniæ est esculentiores epulas inhibere, et anitergia cum eisdem in cuniculos mergenda depingere: æque nimirum ambitio utraque ridenda est: quia sicut egestionum sordes melius pictura non tergit; ita etiam venter hominis suaves cibos a grossioribus non discernit. Porro autem fauces, et gula callent quidem suavitatem ciborum, sed ea diutius perfrui nequeunt, quia ventri protinus quæque dentibus atrita transmittunt. Sic itaque alternis vicibus et gula, cui cibi sapiunt, ab eis in momento deseritur: et ventri non sapiunt, a quo diutius servantur. Explorat autem diabolus quid nos ad vescendum suavius judicemus: hoc igitur oblati, suadet tenaciam, ut exacuat gulam: nimirum dum hoc nulli dare disponimus, et tempus edendi congruum exspectamus, interim mens nostra crapulæ sit meditatorium, et male exundans lebes escarum.

Ut ergo materiam hujus vexationis amittas, projice quod male servatur: et protinus mens libera, deposito omni quo premebatur, erigitur. Quidam vero cum laudiores cibos non appetant, obtentu tamen levati, levandive jejunii refectionis frenum præcipiti libertate relaxant. Sed certum est, quia ciborum illa immoderata perceptio, corpus non tam viribus roborat, quam mole gravat, sensum obtundit, torporem ingerit, somnolentiam parit; et dum utique ventositatem frequenter efflare compellitur, cor fixum in oratione vel psalmodia tenere, tumor, vel, ut ita fatear, languor incolumis necessario prohibetur. Si itaque vires insumendis alimentis exspectas, nunquam modum temperatæ sobrietatis exceedas: quia, quod salubre est corpori, constat etiam corporali amicum inesse virtuti.

#### CAPUT XXI.

##### *De vestium paupertate, et vilitate amanda.*

Vestibus quoque vilibus et paucis esto contentus. Assuesce igitur, ut levi ac peregrino semper induaris amictu. Quod quidem in initio non sine labore sit, sed procedente consuetudine, dum quasi in naturam vertitur, incommoditas frigoris facile mitigatur. Porro extremitas vestium, ciborumque penuria omnem avaritiam de corde monachi prorsus expellit. Ad quid enim mihi concupiscere quod nec alimentis, nec indumentis accrescat? Igitur et nuditatem pedum, et exiguitatem vestium, lecti duritiam, ciborum asperitatem, **348** aquæ potum, percipiendo pulmentum, et cætera hujesmodi, incipientes quidem non sine quadam formidine perhorrescimus; perseverantes autem, et longanimiter insistentes, facilia prorsus, et tolerabilia deputamus. Asperitatem quippe frequentia mitigat, rigorem consuetudo commendat.

#### CAPUT XXII.

##### *De nihil pro certo definiendo, et de cogitationibus discernendis.*

Hanc etiam tibimet indicere consuetudinem non graveris, ut aggressurum te aliquid, facturumve nunquam pro certo definias: sed potius, si Deo

A placere cognoveris, cum quadam videlicet condione disponas, omnemque voluntatem tuam a Dei voluntate suspendas. Sic itaque ad agendum aliquid extrinsecus satage, ut supernæ dispositionis arbitrium assidue versetur in mente: quatenus si conatus tuus obviante cuiuslibet difficultatis obstaculo frangitur, mens tua protinus ad divinæ providentiæ judicium revertatur. Inter fluctuantes plane cogitationum inundantium impetus, mentem tuam quasi rete constitue: quæ videlicet recta consilia, velut pisces, contineat; et vanas cogitationes effluere, atque elabi, velut repentina quæque abominanda permittat. Discerne cogitationes, et non solum quæ ad mentem veniant, sed etiam unde veniant, vigilanter attende. Animadverte quod B loquor; sæpe namque malignus hostis præterita peccata ad mentem revocat, ut eisdem rursum illecebriis delecteris: sæpe divinus Spiritus id ipsum facit, ut in fletibus compungaris; et cum una eademque ad diversos exitus tendat, plerumque mens improvida, quid circa se agatur ignorat. Sæpe a bono spiritu bona cogitatio peragendæ videlicet pietatis immittitur, cuius se auctorem callidus insidiator astuta persuasione mentitur; ne scilicet bonum fiat, quod decepta mens ab adversario suggestum putat. Sæpe dum psallimus, tanquam officiosis cogitationibus a diabolo vehementius oppugnamur; ut dum mens nostra quasi pium quid cogitare se considerat, ab intelligendo, quod psallit, oculos licenter avertat.

C Porro dum psallimus, Deo nostro sacrificium laudis offerimus. Sed huic sacrificio, pestilentes spiritus, velut harpyiæ circumvolant, et pravas ingerendo cogitationes tanquam injectis illuc quibusdam sterco-ribus foedant: aut certe omnino diripiunt, si temptationibus nos infestando, ab oratione compescunt. Sed sicut sacrificia placare Deum, si nobis rapta sunt, nequeunt; ita et quæ fuerint inquinata, auctori munditiæ placere non possunt. Unde pari modo cavendum est, ne vel nos acquiescamus in temptatione desicere, vel hostis insiliens sacrificium nostrum cogitationis foedæ contagione valeat inquinare. Sive autem Scripturarum meditationi deditus, sive operi cuiquam sis intentus, frequenter adorationem recurre, et terræ prostrato corpore, mentem ad cœlum erige. Quo fit, ut et cor tentatio deserat, et ab oculis acedia diu sedentibus importuna discedat: verum **349** noli diu prostratus jacere, quia tunc diabolus, tanquam et ipsa mens jaceat, ad tentandum acris infestare festinat, et mista somno cogitationum phantasmata subministrat. Quotiescumque enim occultus hostis dormitantis oculos palpitare conspernit, mox tædioso cordi jaculum pravæ cogitationis insigit. Quia tunc videlicet opportunum nocendi locum callidus insidiator invenit, cum mentem nostram a custodiæ succ circumspunctione languescere per oculi exterioris indicium deprehendit. Sæpe manus ad orationem in modum signi salutaris extende, ut dum crucis imaginem conarisi exprimere

merito apud Crucifixum veniam debeas facilius impetrare.

### CAPUT XXIII.

*Contra omnes tentationes, mortis sepulturæque memoriā multū prodesset.*

In omni autem titillantis pugnæ certamine, sepulcrum stude semper ad memoriam revocare. Ira fortassis effert animum, dirige protinus oculos ad sepulcrum; mox enim omnis amaritudo deponitur, dum quo furor humanus vergat, mens provida contemplatur. Superbiæ spiritus inflat, sepulcrum ad mentem redeat; necessario etiam illic rigidæ cervicis tumorem premimus: ubi cinerem nos procul dubio pulveremque pensamus. Quid superbis, terra et cinis? invidiæ faces inflammant, et ad sepulcrum respice; et disce, quia qui tam cito ab hac vita discedimus, frustra bona temporalia aliis invidemus. Incentiva libidinis æstuant, sepulcrum doceat quam velociter humani corporis viror arescat, et quam superfluo voluptuosum corruptibili carni cubile substernitur, quam videlicet horrendæ domus requies in proximo præstolatur.

Gulæ pruritus illecebrat, sepulcro protinus ad mentem reducto, considera: quia dum carnem nostram delicate, vel tenere fovendo distendimus, cibum procul dubio vermium saginamus: eoque fit, ut quo plura comedimus, a pluribus comedamur: dumque ventrem molliter alimus, ingratiss convivis pinguia alimenta nutrimus.

Avaritiæ stimulus incitat, ad sepulcrum præsto semper recurre, ibique condisce, quia mortalitatis ejus incassum stipendia plura congerimus, qui iter ipsum quod pergimus, tam brevi spatio terminamus. Accedia te, vel somnolentia deprimit, sepulcrum te doceat pro æternis nunc præmiis vigilare, in quo videlicet, te necesse est diutissime sine ulla postmodum remuneratione quiescere, quatenus qui æternam requiem gaudii cœlestis exspectas alacriter, nunc cum propriæ torpore desidia, momentaneo labore configas.

Vestium te nitor oblectat, ad sepulcrum recurre, atque perpende, quam vesane desipient, qui exornare vile pulvisculum vestibus ambitiosis anhelant: qui nimirum idcirco lutum auro contegunt, sordibus munditiæ superponunt: quia quæ vera sunt ornamenta interioris hominis non intelligunt. Vana gloria soletassis elevare te nititur, ad sepulcrum respice, et quo sine omnis **350** humana gloria claudatur, attende: « Omnis enim caro fenum, et omnis gloria ejus, quasi flos feni (*Isa. IV*). » Prurit lingua per ventosa, sive scurilla verba diffluere, sepulcrum ad mentem redeat, et sicut a criminosa, sic etiam ab otiosa te, vel jocosa nihilominus loquacitate compescat. Illic nimirum perite valebis addiscere, quam districte nos expediatis cunctis hujus vitæ vanitatibus declinare: et ne plura enumerando te diutius protraham, in omni pugnæ surgentis articulo hæc te sollicitudo non deserat, ut protinus mentis oculos ad sepulcrum contemplanda convertas: quatenus dum te illic immuni-

A dum abjectumque pulverem esse consideras, cervicem cordis adversus Conditorem in arrogantiam non extollas; dumque te conspicis procul dubio moritum, jam te pulsantibus vitiis exhibeas velut mortuum. Esto quoque sollicitus, ut cum pravam tibi met cogitationem adesse persenseris, extenso pollice, protinus cor tuum signare festines: quatenus dum in ipsam carnem signum sanctæ crucis imprimitur, continuo interior homo ad dimicandum cuim cogitatione perversa totis viribus excitetur. Sieque mens, sublato triumphali vexillo, hostibus suis viriliter obviet: et propriis sedibus, dum adhuc in vestibulo retardatur, exturbet.

### CAPUT XXIV.

*Quomodo confiteri debeas.*

Quod si aliquando consistens in cellula illicitum aliquid cogitando, vel etiam operando, peccaveris, unde te quantumlibet conscientia pavefacta remordeat, non statim confessionis gratia prodeas, vel propositi silentii rigorem frangas; ipsi autem Deo Domino nostro Jesu Christo interim confitere, et futuræ jam confessionis, velut quasdam illi arrhas, in hunc modum trade: « Domine Jesu Christe, æterne Ponifex, et sanctorum minister (*Hebr. ix*), ac veri tabernaculi sacerdos juxta ordinem Melchisedech, qui sanctum et immaculatum proprii corporis tui agnum, hostiam salutarem obtulisti Deo Patri in odoreni suavitatis pro peccatis nostris, et sic non sine sanguine semel in anno in Sancta sanctorum intrasti, hoc est in ipsum cœlum, ut appareas vulnui Patris, tibi confiteor quia cecidi in hoc peccatum, quod oculos tuæ majestatis latere non potuit. Unde et propter illud, et propter alia innumerabilia, et gravissima peccata mea non sum dignus infelices oculos meos levare ad cœlum, vel ingredi in sanctam Ecclesiam tuam, aut etiam benedictum nomen tuum pollutis labiis meis exprimere. Quapropter lacrymabiliter obsecro immensam clementiam tuam, qui pro peccatoribus mihi similibus mori dignatus es, ut hoc mihi clementer indulgeas, et ad veram fructuamque pœnitentiam me pervenire concedas. »

Quod si adhuc etiam quæris, quomodo solus ad horam primam, sive completorium debeas confiteri, sic dico: « Ego miserrimus et infelix confiteor coram Deo, tibi, sancta et gloriosa virgo Maria, et vobis, omnes sancti Dei, mea culpa, peccavi nimis per superbiam, in suggestione, delectatione, consensu, cogitatione, **351** verbis, et opere. Propterea deprecor te, piissima Dei Genitrix, et vos omnes sancti et electi Dei, ut orare dignemini pro me misero peccatore. Intercedentibus vobis omnibus, misereatur mihi omnipotens Deus, dimitat mihi omnia peccata mea, liberet me ab omni malo, conservet, confirmet, corroboret me in omni opere bono, et absolvat me Deus ab omni vinculo delictorum meorum, et perducat me Christus Dei Filius ad vitam æternam. Amcn. »

## CAPUT XXV.

*De his quæ ad levandum pondus eremiticæ austoritatis valent.*

Plane omni conatus instantia, summisque viribus enitere, ut ad lacrymarum gratarum contemplationisque perfectionem possis attingere. Quod nimur non ad hoc tantummodo proficit, ut in illo beatitudinis regno gradus superior acquiratur : sed ad hoc etiam, ut in hac ipsa vita quam ducis, omnis rigidæ austoritatis horror abscedat ; seseque quidquid distinctionis, quidquid afflictionis amarum videbatur, in dulcedinem vertat. Cum videlicet amor timori, libertas successerit servituti, tunc necessitas in voluntatem vertitur, et inenarrabili charitatis incendio suave fit et jucundum quidquid eatenus videbatur asperum et durum. Porro Israeliticus ille populus in vastitate eremi constitutus, cum et in Ægyptum jam redire non posset, et adhuc promissam terram, meritis præpedientibus, non intraret ; laboris et itineris tedium, diversæque necessitatis inopiam coactus est sustinere (*Exod.*). Sic nimur, sic quisquis tenebrosam mundi hujus jam latitudinem sprevit ; sed adhuc tamen ad perfectionis culmen, torporis astrictus ignavia non aspirat : multas ærumnarum, laborumque molestias necesse est perferat : utpote inter utrumque consistens, et mundæ prosperitatis qualicunque consolatione non utilitur, et tamen adhuc supernæ contemplationis lumine perfaci non meretur. A mundo siquidem avertit oculos, quem reliquit ; et lumen needum valet videre, quod querit ; non habet jam de sæculari delectatione quod gaudeat, et spiritualem lætitiam non degustat, ad quam videlicet non ingenuo servore festinat.

Quapropter, aut ad perfectionem totis nisibus elaborandum est, aut multa calamitatum tentationumque tedia preferenda. Durum sane est regalis curiae militiam sustinere : at postquam gratiam Regis adeptus, ejus cœperis lateri familiarius adhærere, cubiculum frequentius ingredi, astare conspectui, mutua miscere colloquia, privatis interesse consiliis; totus mox ille militiae labor dulcis, et amoenus efficitur, inquietumque negotium quavis quiete suavius deputatur. Nimur sine labore laboras, sine molestia satagis, sine vexatione discurris.

Festina ergo vitiorum passiones elidere, ut in cubiculum Regis admissus, ei valeas tanquam domesticus adhærere; et mentis tuae acies eo liberius in lucis Auctorem intendat, quo tenebrosa phantasmata, vanarumque cogitationum 352 caligo non obstat. Sæpe autem dum multiplici tentationum obsidione vallamus, divinæ respectu clementiæ repente in contemplationem rapimur. Et sic velut intra divisorium, magnificam Regis gloriam per occultas rimas inspicimus; dum corpore foris posito, ventorum procellas, et pluviarum inundantium turbines sustinemus. Sicque quodammodo solus oculus deliciarum regalium voluptate persfruitur, dum membra cætera slabris et cruciatu-

A bus exponuntur. Ut ergo levigetur labor itineris, tendendi sunt oculi ad requiem mansionis. Leve nimur sit omne quod peragimus; si præ oculis meta semper habetur, ad quam festinamus. Illud quoque ad allevandum distinctionis eremiticæ pondus non mediocriter proficit : si cibi parcioris inopiam, et potus ariditatem, aliaque nonnulla carni contraria, sibimet quis ad tempus indicit. Nam cum postmodum ad consueta revertitur, consuetudinis regulam, remissionis lassitudinem arbitratur : et collatione quadam facta, lucrum caro non minimum deputat, his aliquid adjecisse, quibus tunc contenta vivebat.

## CAPUT XXVI.

*Quomodo lacrymarum gratia possit acquiri.*

B Sed quia lacrymis insistendum esse docuimus, consequenter etiam quomodo ad ipsam lacrymarum gratiam possit attingi, prout earum largitor infuderit, breviter intimemus. Quisquis ergo non tam arido corde mœrere, quam et lacrymarum inundantia queris affluere ; non modo te a strepitu negotiorum sæcularium remove, sed a fraterni sæpe colloquii mutua te fabulatione compesce : omnes a te mundanæ actionis curas, et sollicitudines amputa, et eas tanquam ruderum moles, et meatus obstacula ab obstructi fontis spiramine submovere festina. Sicut enim in caverna terræ de abyssو veniens aqua colligitur ; se i obicibus oppressa, non effluit ; sic in humano corde considerata profunditate divini judicii tristitia nascitur, quæ tamen per fletum lacrymis erumpentibus non emanat ; si terrenorum actuū sufflamen obsistat : tristitia quippe lacrymarum materia est : sed ut hujus fontis possit ubertim vena profluere, satage cuncta negotii sæcularis obstacula removere, et ut quod frequenter expertus sum, non omittam ; ipse quoque spiritualis zelus, disciplina commissorum, correptio delinquentium, sanctæ prædicationis alloquiuni, haec, et his similia tametsi sancta sint, et divina prorsus auctoritate mandata, lacrymarum tamen procul dubio noscuntur impedimenta.

C Si igitur ad lacrymarum gratiam pia vis intentione pertingere, non solum a terrenis negotiis, sed a quorumdam te aliquando spiritualium exercitiorum execucionem compesce. Malitiam quoque, iram et

D odium, et reliquas vitiorum pestes de antro cordis elimina ; ne si te accusatrix conscientia forte remordeat, mens tua intimi roris vacuefacta mordibus, ariditate formidinis contabescat, dicente Scriptura : « Arescentibus hominibus præ timore (*Luc. xxi*). » Sanctitatis quippe fiducia, et testis innocentiae conscientia puram mentem quibusdam cœlestis gratiæ rivulis irrigat, et resolvit in lacrymas, duriatiam squalidi cordis emollit, et profluendi meatum fletibus aperit. Sit ergo conscientia tua pura, munda, nitida ; si sincera, azyma, atque ab omni labe nequitiarum spiritualium defæcata : et cum compunctione cordis erumpere properat, obex mordacis conscientiæ non obsistat ; neve cor pavidum dignæ for-

353 scientia puram mente quibusdam cœlestis

midinis algor obstringat, et lacrymarum aqua versa  
in glaciem non currat: quanquam et metus crimi-  
num compunctionem aliquando pariat lacrymarum.

Sed aliud est timor servilis, aliud gratia spiritalis, qua videlicet holocausta medullata Deo super aram contriti cordis offerimus: et pingue sacrificium in odorem suavitatis salubriter adolemus. Quæ nimirum sancti Spiritus gratia si defuerit, licet montem ad supernam gloriam quis sublevare contendat; licet gehennæ supplicia, vel præterita peccata ad memoria reducat, vel etiam Dominicæ passionis mysteria recolat; propter hæc tamen omnia lacrymæ non erumpunt, cui mentis arcana peccatis exigentibus obdurescunt. Tu autem, sicut prudens et operosus agricola, agrum tuum indesinenter exerce, terram tui cordis, et corporis vomere sanctæ disciplinæ proscinde, glebas duritiæ minutatim contere, vitiorum vepres extirpare contendere; et sic paratus quotidie, tensis in cœlum oculis superni imbris inundantium præstolare. Nam sumus Arbiter, ille vide-licet occultus inspector, qui stat post parietem nostrum, et respiciens per fenestram, prospiciens per cancellos (*Cant. ii*); licet ad tempus aquam prævida dispensatione contineat: si te sic solerter agentem, ac vigilem esse conspexerit, agrura in proximo uberibus proprii charismatis imbris irrigabit; et ita diversis virtutum floribus ager ornabitur: ut qui eatenus squalidus ac sterilis videbatur, jam preventu exuberantium segetum feraciter cumuletur.

## CAPUT XXVII.

*De perseverando in eo vitæ modo , quem semel quis arripuerit.*

Præterea vitæ modum , quem semel arripueris, perseveranter tene , constanter exsequere , ne scenica, quod absit, a temetipso videaris vertigine discrepare. Nolo igitur male volantis Icari sequaris exemplum : qui nimirum dum modo summa penetrat, modo dimissis alis in ima declinat, inconstantiæ suæ diffrenata libertas in hiantis eum pelagi profunda præcipitat, ne forte ; quod dicitur, multicolorem te nutans mutabilitas reddat ; sed uniformem potius status gravitatis exhibeat. Persevera itaque in eo quod cœperis , et rectam consuetæ vitæ lineam tene ; ne te novum semper variatae vitæ diversitas reddat, sed in sanctæ constantiæ fundamento præfixæ regulæ consuetudo stabiliat; ut diuturnæ consuetudinis usus obdulces , quod tanquam amarum prorsus , et asperum insirmitas humanae fragilitatis abhorret. Exhibe te undique virtutum nitore conspicuum, et uniformi, ut ita loquar, veste sanctitatis ornatum , cui videlicet , nullus cu-  
**354** juslibet vitii pannus videatur assutus. In honestum quippe videtur, atque ridiculum, si indutum te veste purpurea, sericis ocreis, calceis deauratis, solum te villosi arietis pileum inter multas ornamentorum insulas exhibeat rusticatum.

. Quod dicere gestio, tale est: cum in afflictione  
jejunii, in censura silentii, in abjectæ vestis aspe-  
ritate Antonium præbeas; ne in levitate riſus, vel

A facetæ dicacitatis urbanitate, Democratum ostendas.  
« Quis enim consensus templo Dei cum idolis ? Quæ  
societas luci ad tenebras ? Deo ad Belial ? » (*II Cor.*  
*vi.*) « Modicum » enim « fermentum totam massam  
corruxit (*I Cor. v.*). » Sic igitur ager animæ tuæ  
virtutum segetibus floreat, ut nequaquam veprium  
aculei per incuriam inhorrescant. Sic ex una parte  
rectitudo videntes ædificet ; ut ex altera vicio  
emergente, velut impacto ariete, quod ædificatum  
est, non vacillet. Esto itaque gravis incessu, ma-  
turus in verbo, piger ad vindictam, velox ad in-  
dulgendam pœnitentibus veniam. In omnibus te  
exhibe consummatæ virtutis exemplum, et, ut di-  
citur, uñdique te præbe teretem, atque rotundum :  
ut malleo nunc disciplinæ contusus, et lima pœni-  
tentiae, sanctique certaminis expolitus, postmodum  
sine tñnitu, vel strepitu ponaris in ordine lapidum  
ignitorum.

## CAPUT XXVIII.

*Qualis eligi, et qualis esse debeat eremitarum prior.*

Quia igitur pro styli compendio qualiter conver-  
sari debeat eremita, uteunque descriptsimus; qualis  
etiam esse eremitarum prior expeditat, in calce opu-  
sculi breviter annexamus. Nec dicendus est ordo  
piæsterus, si is qui officio futurus est primus, in  
descriptione regulæ ponatur extremus; cum et prius  
debeat in eodem proposito vivere, quam præesse,  
omniumque se præbere debeat minimum, qui in re-  
giniæ videtur esse prælatus. Cavendum itaque est,  
ne de monasteriali ordine prior eligatur inter ere-  
mitas; licet prudens, et doctus, vel regularibus di-  
sciplinis videatur instructus. Sed ex ipso proposito  
spiritualis frater eligatur, qui videlicet jam cœperit  
eremitice vivere, et experimento didicerit contra  
spiritales nequicias dimicare; qui pugnas alieni cor-  
dis ex semel ipso domestice colligat, et quod ex ore  
confitentis audierit, ex propria conscientia, velut  
trita manus ad prælium, recognoscet.

Stude itaque prior, ut te contiguus alloquar, quatenus quos prioratus officio superas, si possibile est, quantumlibet etiam vita præcedas. Vivida quippe, et efficax in discipulorum cordibus prædicatio est, aliis alimenta providere, providentem vero in jejunii rigore persistere. Optime vigilias prædicat, qui post longum psalmodiæ decursum, signum excitandis fratribus pulsat: eloquentissime, dum tacens, silentium commendamus: fructuose de extremitate vestium disputat, qui se pannorum concissione deformat. Indumentorum vero juxta divitem nitore conspicuus, frustra cum Joanne pilos prædicat camelorum. Ultor injuriæ patientiam **355** non suadet. Qui cumulandis pecuniarum quæstibus inardescit, ignem avaritiae in alieno pectore non exstinguit. Qui crebra vagatione raptatur, de remorandi censura frivolus disputator habetur. Qui autem cellulam perpetuus incolit, ad stabilitatis præconium de toto corpore linguam facit; et cum os faceat, muta membra melius, quia et simplicius, clamant.

Vitæ tuæ semper habeo testem, qui et occulta bona tua in fraires ædificatoria debeat relatione transfundere, et famam tuam a sinistra possit suspicione purgare. Per planiora duc gregem tuum ; sed excelsa interim discretus duxit ostende : quatenus dum dispensationi tuæ deputant, quod renissius vivunt, et auctoritati Patrum districta, quæ audiunt, ad condescendendam perfectionis arcem expeditius accingantur ; pudeatque ipsos ignobiliter in imis hebescer, qui per excelsa condiscunt prævios ingenuæ committentes. Per recta gradientibus te supparem præbe : in delinquentes autem disciplinæ vigorem zelatus exerce. Pro observanda intra conscientiam innocentiae puritate, noli virgam deponere disciplinæ : sic tamen correptionis verbum ex labiis proferatur, ut fratrem amoris in pectore dulcedo servetur. Sicut plane capiendis avibus de manu stantis accipiter advolat : sic indignationis vox sine tuæ mentis indignatione procedat. Nam et sagitta, cui insigitur, vulnerat : sanguinem tamen is a quo prodiiit arcus ignorat. Notandum tamen, quia fragilis mens ab eremi perseverantia facilius frangitur, etiam si levis injuriæ summotenus occasio præbeatur. Nam et gravis sarcina tanto minori deliberatione deponitur, quanto et ipse quodammodo suadere videtur humerus qui gravatur.

Facile igitur ab illorum cohabitatione disceditur, ubi quisque quotidiana frui victus inopia, rariissimam vero copiam tolerare jubet. Unde temperata disciplinæ arte utendum ; ne quos afflictio privata debilitat, injecta duræ correptionis asperitas sternat. Cujuscunque autem fortiter agentis exemplum, siquidem ex tuis est, suppressa persona, profer in medium, si autem extraneus, vocabulum exprimatur. Efficacius enim modernorum cohortantur exempla, quam veterum ; et magnæ confusionis pudor est, si cum sanctis viris in una simul ætate viventes, in rectæ conversationis studio eis in aliquo non reperiantur æquales. Quandoquidem illos sola mentium ingenuitas roborat : istos autem diversorum temporum debilitas non excusat.

#### CAPUT XXIX.

*De venientibus ex sæculo ad eremum.*

Si quando dè sæculari habitu quis ad eremum converti voluerit, noli, juxta priorum normam, rudimenta monasterii suadere : sed si devotio vera ac sincera patuerit, in eremo, quam flagitat, conversationis aditum præbe. Eo quippe, ut lugens loquar, pleraque devoluta sunt monasteria, ut vitiosiores reperiantur ab eis ingressi : quam ii, qui nuper 356 sunt de mundani naufragii fluctibus eruti. Et certe simplici metallo monetæ signum congruenter imprimitur : at posquam falsatus est nummus, difficile est ut ad veritatem monetalis regulæ corrigitur.

Pateat igitur aditus venienti de sæculo, ut imprimitur quodammodo simplici superveniens figura

A metallo. Ingressus autem cellulam, non statim omnem consuetudinis regulam permittatur implere : sed diu querat, quod difficulter inventum, charius teneat. Postmodum vero processu temporis omnes sancto desiderio relaxentur habentæ, et quidquid ardui mens spirabat, attenitet : ut in ipso fervoris spiritu semitæ sublimioris iter aggrediatur incedere, a qua postmodum pudeat ignobiliter declinare : et initii sui rudimenta pro exemplo semper ante oculos teneat, ut si non eminentiora concenderit, ab his saltem dilabi, quæ dudum cœperit, erubescat.

#### CAPUT XXX.

*De his qui ex cœnobitica conversatione ad eremum accedunt.*

Si autem de regula monasterii sit, qui ad eremum properat, superstitiones quasdam monasticæ disciplinæ censuras, superyacuos tipiñabulorum clangores, cantilenarum multiplices harmonias, ornatorum phaleras, et cætera talia, quadam sobriæ reprehensionis arte dijudica, competenter extenua, sine damnatione depretia, inferens illud Apostoli : Quia in Christo Jesu neque circumcisio aliquid valet, neque præputium, sed nova creatura (*Galat. vi.*). Et iterum : Quia Altissimus non in manufactis habitat (*Act. viii.*). Illud etiam ad Timotheum : Quia corporalis exercitatio ad modicum utilis est, pietas autem ad omnia utilis est (*I Tim. iv.*). His igitur et hujusmodi documentis existimationem monasterialis ordinis quodam modestæ censuræ libramque supprime ; ut dum in audientis mente fabrica consuetæ vitæ destruitur, prælatæ solitudinis ædificium construatur : et ad standum se de cætero constanter accingat, qui se hactenus jacuisse considerat.

Si vero post peracti laboris diurna certamina post edomatas maceratae carnis illecebras, cum jam se viderit quoruñdam vijorum, velut totidem hostium, calcare cervices, cœperit immoderatus transacta despicer ; et ea, quæ præsto sunt, liberiori laude proferre ; tunc cœnobitorum sunt efferenda præconia, et quæcunque in eorum discipulis aguntur, ad Dei gloriam referenda ; ac salutaris obedientiæ perhibenda sunt sacrificia ; qualenus dum professio vitæ communis extollitur, de singulari proposito, si qua forte subrepserat, arrogantia deponatur. Et nequaque quasi de perfectioris vitæ privilegio tumeat, dum plerosque in inferiori gradu tanto sublimius incedentes adhuc fortasse non æquat. Admonendus est, ut si quid agendum fortassis immineat, non propterea quoruñdam more cœnobitarum, velociter psallat : et sic de Psalterio ad negotium vice perversa, tanquam de pelago ad littus enatare contendat. Anxietatem quippe spiritus, callidus insidiator 357 immittit : quietum vero et hemilem animum, ubi requiescat, princeps pacis inquirit. Respondeat igitur adversario suggesti fabulosa, dum psallit : dum hoc, quod præ manibus est, officium perago, interim tace ; postmodum si quid causa dictaverit, innotesce.

Quod si adhuc pertinacius ingruit, et obfirmatus

insistit, utrumque simul, et id quod mittitur, et eum qui miserit maledicat, Adjiciat quoque verbis eum terrere minacibus, dicens: Me infelix desere, et tremendum judicii diem ante oculos pone, in quo videlicet juste damnandus es, et perpetuis postmodum flammis ultricibus exurendus. Qui nimurum terror plurimum valet ad superandam pugnam, et ad effugiendam versuti insidiatoris astutiam. Hinc est etiam, quod præmissis orationibus exorcismi, semper ex ecclesiastica traditione subjungitur: Qui venturus est judicare vivos et mortuos, et sæculum per ignem: ut dum malignus spiritus tanta formidine in tentatione percellitur, a creatura Dei territus expellatur. His et hujusmodi telis commilitones tuos subtiliter instrue, et in acie cum adversariis jugiter dimicare prævius doce.

#### CAPUT XXXI.

*De patientiæ virtute, illi qui præst maxime necessaria.*

Plane cum omnibus debeas florere virtutibus, qui ad virtutis exemplum es super alios constitutus, patientiæ virtuti propensius studeas: omnigenæ adversitatis obstacula per patientiam vince. Patientia te durum lapidem, imo inseabilem præbeat adamantem. Adamantis quippe sigillum formam cæteris lapidibus imprimit: sed vicissim in se nullius soliditatis imaginem prorsus admittit. Mens quoque tua si irruentibus adversis nulla se perturbatione mutaverit, velut alieni in se lapidis imaginem non accipit: imo suum aliis characterem imprimit, dum quidquid adversitatis acciderit, in salutem sibi suavitatem mentis, et animi tranquillitate convertit. Aut nunquam, aut raro capitulum cum fratribus celebretur, quo missa metanœa te non accuses; ulti etiam in te scoparum disciplina procedat, humili satis auctoritate deposce. Si vel tuum, vel cuiuslibet fratris læsum adversum te animum senseris, noli quiescere, donec studeas vulnus mentis, prout causa dictaverit, vel corripiendo, vel mulcendo, vel etiam satisfaciendo sanare. Idecirco autem super prioris officio diutius verba protrahimus, quia divina gratia præduce, omnem subjectorum perfectiōnem in ejus pendere magisterio non ambigimus. Quod enim stomachus in humano corpore, hoc præmodum prior est in fratrum spiritualium congregatiōne. Sicut enim de stomachi receptaculo vigor et robur per omnia corporis membra diffunditur; ita nimurum de bene administrato **353** præsidentis officio omne corpus in charitatis compage degentium vegetatur.

#### CAPUT XXXII.

*Nen perfecta et consummata eremitice vitæ insti-*

**A** *tuta, sed leviora quadam hujus conversationis principia in hac regula contineri.*

Obsecro autem ne me, fratres mei, districtori quām hic legitur, lege viventes, dissolutionis arguant, et austoritatem eremi temperasse, austerioris forte censuræ quam debeant, suggillationibus reprehendant. Nam cum Israelitæ illi carnales decidentibus Benjamin filiis venialiter parcunt, unamque ex Israel cecidisse tribum lacrymabiliter gémunt, et amaris fletibus et ululatibus conqueruntur: quid nobis agendum est, cum videamus inter ecclesiastice disciplinæ reliquos ordines eremiticæ professionis numerum eatenus imminutum; ut in plerisque terræ provinciis non ambigamus funditus esse deletum. Parcendum est ergo Benjamin, egregiis videlicet, ac robustissimis inter Israelitas cæteros bellatoribus; quatenus venialis, et moderata discretio per posteritatis incrementa multiplicet, quos utique districta severitas, vel potius humana fragilitas annullavit. Et sic tribuum numerus constet, dum eam, quæ perisse videbatur, austoritas temperata conservet. Nam et illud quoque non excidit, quod sancti apostoli, qui missi fuerant crucem Christi humano generi prædicare (*Act. xv, xxi*), omniumque virtutum adoptionis filios documentis imbuere, inter ipsa nascentis fidei rudimenta, hoc solum quibusdam præceperunt gentilibus: ut abstinerent se ab immolatis simulacrorum, et sanguine, et suffocato, et fornicatione. Imponentes quippe minima, non prohibuere majora; ut qui novæ doctrinæ duritiæ poterant deterri, quandoque ad fortia convalescerent præceptis mitioribus invitati; et a parvis, ac levibus, velut pueri adhuc lactentes, inciperent, ut graviora legis divinæ manūdata in perfecta postmodum ætate valenter implerent.

**C** Nos etiam, qui spiritalis infantiae crepundias teximus, et lactantis adhuc eremitæ, ut ita fatear, incunabula fabricamus; dum debiles quosque, nostrique consimiles per planiora deducimus, expeditæ præcinctos ab ardui montis ascensu minime prohibemus; quatenus imbecilles adhuc sic lactis liquor enutriat, ut valentes, ac vividos corpulentioris sibi soliditas non repellat. Hoc autem ex divinæ clementiæ bonitate confidimus, quod quisquis illa peragere, quæ in hoc opusculo scripta sunt, augendi proiectus intentione studuerit, non lædetur a morte secunda, nec delebitur nomen ejus de libro vitæ, sed Agnus ille, qui eum post se crucis suæ conspicit gestatorem, in cœlesti Jerusalem ascribet sibimet procul dubio cohæredem (*Apoc. xx, xxi*). Amen.

*Sit nomen Domini benedictum.*